

**UPA2022/95: Tasiilami efterskolimik pilersitsinissaq siunertaralugu pilersaarummik UPA 2023-mi Naalakkersuisut saqqummiusseqqullugit Inatsisartut aalajangiiffigisassaattut siunnersuut.**

(Inatsisartunut ilaasortaq Mala Høj Kuko, Siumut)

**UPA2022/134: Tasiilami adventure efterskolimik pilersitsinissamik Naalakkersuisut peqquneqarnissaannik siunnersuut.**

(Inatsisartunut Ilaasortaq Harald Bianco, Inuit Ataqatigiit)

**Akissuteqaat**

(Ilinniartitaanermut, Kultureqarnermut, Timersornermut Ilageeqarnermullu Naalakkersuisoq)

**Siullermeerneqarnera**

Naalakkersuisut sinnerlugit Inatsisartunut ilaasortat Mala Høj Kuko (Siumumeersoq) aamma Harald Bianco (Inuit Ataqatigiinneersoq) aalajangiiffigisassatut siunnersuutaannut qutsavigaakka.

Siunnersuutit 95 aamma 134, Tasiilami efterskoleraalernissaanut tunngasut, ataatsimoortillugit suliarineqarput. Siunnersuutit annertuumik imminnut ataqatigiimmata akissuteqaammi ataatsimi akissuteqarfigineqarput.

Kalaallit inuusuttut efterskolersinnaalernerat 1960-ikkunni aallartippoq. Ukiuni siullerni amerlasuuni taamaallaat Danmarkimi efterskolertoqarsinnaavoq. 2008-miit nunami maani aamma efterskolertoqarsinnaalerpoq, inuusuttut amerlasuut ukiut ingerlanerini pitsaasumik pissarsinartumillu efterskolerfigisartagaannik.

Efterskolernerup siunertaa atuartut, angajoqqaat ilaqutariillu akornanni annertuumik allanngorartuuvoq. Siunertat ilagisinnaavaat ilinniagarisanik faginik pitsanngorsaaneq imaluunniit ilinniagaqalernissamut piareersarneq. Taamaattorli ataatsimut isigalugu oqaatigineqarsinnaavoq, efterskolerneq atuartup inuttut, inooqatigiinni ilinniakkatigullu ineriartorfigisaraa. Taakkua saniatigut efterskolernikkut atuartoq avatiminiittunik paasisaqarluarnerulertarpoq, aammalu avatangiisit, kulturit inuillu nutaat akornanni nammineersinnaanermik ilinniartarluni. Tamanna aamma atuartunut Tasiilameersunut Tunumilu najugaqarfinni allameersunut atuuppoq.

Ilaqutariit sumiluunniit najugaqaraluarpata, aamma atuartoq kalaallit qallunaalluunniit efterskolianni ilinniarniarluni toqqaagaluarpat, atuartoq angerlarsimaffigalugu najukkaminiit piffissap ilaani nuukkallartariaqartarpoq, nammineersinnaanini ilinniarumallugu inuttullu nammineersinnaasutut ineriartorluni.

Tasiilami efterskoleqalernissamik tunngaviusoq pingaarnerpaaq, soorlu immikkoortumi 134-imi siunnersuutaasoq, tassaavoq Tunumi suliffinnik ineriartornermillu pilersitsissammat. Naalakkersuisut nalilerpaat Tasiilami Tunumilu suliffinnik ineriartornermillu pilersitsiniarneq efterskolimik pilersitsiniarnermut attuumassuteqartariaqanngitsoq.

Naalakkersuisut Tasiilami suliffissaqarniarneq sammilereernikuuaat, suliaqartussanillu Naalakkersuisoqarfinniit assigiinngitsuneersunik inuttalimmik pilersitsereerlutik. Taakkunani Suliffeqarnermut Naalakkersuisoqarfik ataqatigiissaarisuuvoq. Suliniutip siunertaasa ilagaat innuttaasut ingerlaqqiffiusunik ilinniagaqanngitsut suliffissanik amerlanernik periarfissaqalernissaat, kiisalu illoqarfimmi ilinniakkatigut kivitsinissaq, tassunga ilanngullugu atuartut amerlanerit meeqqat atuarfianni atuarsimanerminnut allagartaqarlutik naammassisaqartarnissaat.

Ilinniartitaanermut, Kultureqarnermut, Timersornermut Ilageeqarnermullu Naalakkersuisoq §37 naapertorlugu apeqqummi 2021/106-imi ilaatigut ilisimatitsivoq, Tasiilami efterskolimik pilersitsineq minnerpaamik 158 mio. kr-inik pilersitsinermi aningaasartuutissat naleqartussat missiliorneqartoq. Taakkununnga sulisut inissaannut 8-10-nut, efterskolip ingerlanneqarneranut kiisalu atuartut angalanissaannut aningaasartuutissat ilanngunneqartussaapput.

Taamaammat Naalakkersuisut immikkoortunut 95-imut 134-mullu allannguutissamik ima ittumik siunnersuuteqarput:

“Tasiilami ilinniarfinnik, tassunga ilanngullugu efterskolimik pilersitsinissamik Naalakkersuisut pilersaarusiornissamik peqquneqarnissaannik Inatsisartut aalajangiiffigisassaattut siunnersuut. Suliaq Tasiilami suliffissaqartitsiniarneq pillugu suliniaqatigiit naalakkersuisoqarfinnit arlaqartuneersut, Suliffeqarnermut Naalakkersuisoqarfimmit akisussaaffigineqartut, suliaannut ilanngunneqassaaq.”

Naalakkersuisut allannguutissat siunnersuut aningaasatigut kinguneqassanngitsoq nalilerpaat.